

ITLF BULLETIN

A Publication of ITLF Media & Publicity Department

VOLUME I-ISSUE NO 30

INDIGENOUS TRIBAL LEADERS' FORUM

THURSDAY 13 JULY 2023

Meetei Leepun Chief FIR kibawl khum

Meetei Leepun chief Pramot Singh in chi-le-nam kikah'a kituomona thei thu lhangphuongtah'a ana phuondoh'a, chikhat nuoimang ding' ti'a ana phuondohna chungthu'ah Satminthang Kipgen, President KSO-Sadar Hills le Thangtinlien Haokip, Gen. Secy. KSO-Sadar Hills in Kangpokpi Police Station ah FIR ana ana file lhontai. Pramot in Kuki-Zo chate khatvei thu'a nuoimang ding'a ana gihsal jeh in IPC 120-B, 153-A, 504, 505, 503, 34 nuoiyin FIR bawl khum ahi.

Arambai Tenggol thusim ki-suodoh

Tuchung i-boina uva Kuki-Zo chate chung'a souse mama jieng Arambai Tenggol kiti Meilhei radical group ho chungthu ITLF Media Cell in data theitop suo'a ana chomkhom chu mitin in asimthei ding'a booklet kisiem chu hopdoh ahitai. Hiche booklet 'The Rise of Arambai Tenggol' hi tutadi'a ding in PDF version bou akisuodoh thei nalai in, ITLF website a download thei ding in akikoie.

ITLF Media Cell in Fake PR asuo phamosa; FIR jihlut hita

Phat itih ham apat in kahlah kom-kom leh ITLF Media Cell min in Meilhei hiding'a ginmoho'n Kuki-Zo chate kikah'a kilungkhatna suse thei ding leh i-movement u su-lhasam thei ding thu ITLF Letter Head le Signature siemthu mangcha in ana suodoh zing uvin ahi. Tu hapta sung seh-seh in thumvei asuodoh uvin, hinla muntin'a Kuki-Zo chate'n pan i-lahkhom zing jeh uvin thudihlou kisuodohho i-hedoh thei juvin ahi.

Achiesa July nisim 11, (Tuesday) jaan'a ITLF Letter Head le Signature siemthu'a zouthu ana kisuodoh ANI le Times of India in ana lahson khah jeh in amaho website ah news article ana suodoh kha uvin khoh i-salheh uve. Hichan geiya thilsuoh aumtah jeh in ITLF Media Cell in janni July nisim 12 nikhuo chun Lamka Police Station ah FIR ana file in, police in athu akhuol'a alam hilou'a kichiemho amatdoh loi ding uvin ngehna aneiye.

Moreh a Curfew um

Moreh mun'a Manipur Police Commando umho khatvei vei civil dress a kicon in Moreh khopi sung'a mipi umdan thimvet ding'a ahung potdoh

zap-zapji jeh uvin mipi lungmuonna alhasam theiyin ahi. Janni'a mipi kimanchah dan thimvet ding'a hung potdohho nidang'a bang'a hingmat ding'a aguon'u alosam jeh in volunteer ho'n meithal in ana kap uvin ahi. Mipi lah'a akap'u ahijeh in deibang in volunteer ho achatloh thei pouvin, ahung potdohho aumna'u mun anung jamlut thei uvin ahi. Mipi sousang ventupna ding in sepaiho'n curfew aphuongdoh pai uve.

ZORO makaina'a Rally um; Thulhuhna 3 siem'u

Manipur gamsung boina toh kisaiyin ZORO in janni chun Aizawl khopi'ah Zo chate thuohna athuohpi vetsahna ding in rally ana nei uve. Pu L Ramdinliana Renthlei, Gen. Secy. ZORO min'a lekha kimu in aseina'ah innsung a boina aum tieng leh mipa'n mopuohna alah'a asuhthipji ahi'n, hinla tuchung'a Manipur a genthei i-thuohna uva hin India a ding'a mipa Narendra Modi in imacha aseipuohlou hi donlou dailou'a eikoi'u vetsahna ahi ati.

Rally a chiekhomho'n thulhuhna thum asiem uvin, Manipur boina jeh'a genthei hahsatna tuohho lunggiltah'a ZORO in athuohpi thu aphuongdoh uvin; India government in Kuki-Zo chate a ding'a Separate Administration apieh ding'a ngehna neiding; chule vannuoi leisiet'a Zo Hnahtlhak ho kah'a unity aumzing nading'a theitop suo'a panlahding ti ahi.

Manipur gamsung'a i-mi i-sa ho'u Meilheite'n athat zing uvin, inn-le-lou asuhmang pieh zing uve ti'n demna sangtah aphuongdoh uvin, Biren Singh, Narendra Modi leh David Thiek lu tanpa lim ho ahallha uve.

World Bank Project P176733 khongai sah phot ding'a KSO City Branch in lekha thot

Manipur state a digital transformation aumtheina ding'a World Bank in \$46 Million apieh ding tithu ahung gindoh toh kilhon in KSO City Branch ho'n Kuki-Zo chate'a ding'a thil tijat umtah hithei ding'a ageljah in hiche project khongai sah phot ding in Ajay Banga, President World Bank chu ngehna ana pelut tauve.

EDITORIAL

Manipur gamsung boina jeh in deibang in nitin hinkhuo i-mangthei tapouvin, alien aneo khentum umlou in gaalsat in pan i-lazing uvin ahi. Frontline a gaalsat i-um uvin, relief a gaalsat i-um uvin, media a i-um uvin, sum-le-pai holna'a gaalsat i-um uvin, area zouse'ah mitin in pan i-la uvin Meilhei gaal i-satna uva hin tin-le-ha toh kithuo in pan i-lazing uvin ahi. Hibangse'a gaaldou'a pan i-lahzing lai uva i-tha'u alhahsam louna ding'a apoimo pen Pathien bel'a Pathien masang'a dilsu'a gaal i-satna'u hi apoimo lhez jieng in ahi. Tuni chan'a Hou-inn kikhahlou'a sun-le-jaan'a taona'a gaalsat-ho zouse chung'ah kipathu i-phuongdoh uve.

Eiho bawlttheina khellam'ah Pathien in nna atongji'n, ginchat loubehna munho'a zong Pathien in eihin huhdoh uvin, malsawmna jatchuom chuom i-muthei jiuvin ahi. Pathien in ei-huhdohna'u thusimhi nikhuo khat tieng leh Pathien vahchoina'a i-manteidi'u ahi'n, Pathien panpina thum ding leh Ama angsung'a kineosah'a dilsuh ding thasietna'n nei poute.

Boi akipat apat in tuni geiyin India PM Narendra

Modi in kamcheng khat jieng zong akehdoh hihlaiye. Boi khohsiet laitah in khuol eizin mangsan uvin, tuhin zong July nisim 14 nikhuo leh France a Bastille Day mang ding'a khuolzinding in akiguong kittai. Ichan in eihin kihetmo sah zong leu Pathien eiho lam'a apan leh itihchanpi eihin kihetmo sahtheidi'u ham? July nisim 14 a akhuolzinding masang, July nisim 12 nikhuo'n France khopi Strasbourg a European Parliament kihouna chielha zing in Manipur a namkal'a boina thu aseidohdi'u ahi. India in Human rights palkeh'a natosh anei zing'e ti'n ngohna aum in, chule BJP government zong hatah in thiemmo channa thu aphuongdoh uvin ahi.

I-chan'a akihetmosah vang'a European Parliament in Manipur thubuoh kihouna'a aneithehi eiho'a ding'a gaaljona khat ahitai. Hiche hi eiho bawlttheina kalval'a Pathien kithuopina i-channa'u ahi'n, maban'a zong eiho'a ding'a thil phachuom asuodoh zing theina ding'a taona'a gaal i-sat'u hi thaselou'a pontho tah'a Pathien masang'a i-lungthim pumpi'u toh iki piehlut zing ding uvin iki tiem uve.

- ✓ Kuki Women Union (KWU) Teising Block akipat in thinglhang me bag 29 ITLF Relief Dept in ana mu e. (12 July 2023)
- ✓ EBCC Tribal Colony, Dorcas ho akipat in panpina dangka Rs 10,000 ITLF in aki mu e. (12 July 2023)

UPDATE TILL 13 JULY 2023



113
CONFIRMED DEATHS



197
VILLAGES BURNED



7000+
HOUSES BURNED



359
CHURCHES BURNED



41425
DISPLACED PERSONS



204
RELIEF CAMPS

RELIEF SUPPORT

Office: Lamka Govt College, Hiangtam Lamka

Contacts:

Mangcha Thangzom – 8837368373 (Convenor)

V. Gouthianmuan - 9862086583 (Co-Convenor)

FINANCIAL SUPPORT

Office: Lamka Govt College, Hiangtam Lamka

ITLF Joint Bank Account:

Name: Henkhopao Haokip & N. Vialkhanthang

Account No: 41912626404

IFSC: SBIN0064016 | Bank: SBI Salbung Branch